

INUIT ATAQATIGIIT

Inatsisartuni



20. august 2018

UKA 2018/164

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalackersuisut kingusinnerpaamik UKA2019-imut inatsisinik atuuttunik allanngortitsinissaq pillugu siunnersuummik saqqummiussinissaat, taamaaliornikkut eqqumiitsuliornermut aningaasaateqarfimmik pilersitsinikkut eqqumiitsuliornermut aningaasaliissutinik tamanik agguassinermi attuumassuteqannginnissamik pilersitsinissaq periarfissinneqarsinnaanissaat ilanngullugu Inatsisartuni aalajangiiffigisassatut siunnersuut

(Inatsisartunut ilaasortaq Peter Olsen, Inuit Ataqatigiit)

Tunngavilersuut:

Siunnersuutiginiuusimasara tunngavigalugu, ukiaq 2017-imi novemberi qiteqqukkaa ataatsimiinnitta nalaani Naalackersuisut saqqummiuppat Namminersorlutik Oqartussat kulturimut tapiissutigisartagaasa allaffissornikkut ingerlanneqartarnerannut periarfissanik nassuiaasiaq.

Nassuiaasiaq taanna agguanneqartoq imatut qulequtserneqarsimavoq:

“Namminersorlutik Oqartussat Kulturimut tapiissutigisartagaasa allaffissornikkut ingerlanneqarneranut periarfissanik nassuiaasiaq”

Nassuiaammi pineqartumi ullumikkumut tikillugu Namminersorlutik Oqartussat iluanni kulturimut eqqumiitsuliornermullu tapeeriaatsit assigiinngitsut sukumiisumik nassuiarneqarput, taassumalu saniatigut nunatta avataani, tassa nunani avannarlerni tapeeriaatsit assigiinngitsut aamma assersuutitut saqqummiunneqarlutik.

Eqqumiitsuliornikkut aningaasaateqarfimmik pilersitsisoqarsinnaaneranut tunngatillugu periarfissat suunersut pillugit Naalackersuisut nassuiaateqarnerminni oqariartuutigaat ullumikkut inatsisit pigineqartut tunngavigissagaanni eqqumiitsuliornikkut aningaasaateqarfimmik pilersitsinissamut tunngavissaqanngitsoq, tamannali aatsaat inatsisartut nutaamik inatsisiliorneratigut pisinnaassasoq.

Taamatut Naalackersuisut oqariartuuteqarnerminni Eqqumiitsuliornermut inatsit 2016-meersoq innersuussutigaa, nassuiaammilu ilaatigut ima allassimasoqarpoq:

“Eqqumiitsuliornermut aningaasaateqarfimmik aningaasanik agguassisarnermik isumaginnittussamik pilersitserusuttoqarpat, Namminersorlutik Oqartussat Aningaasanut Inatsisaanni eqqumiitsuliornermillu ingerlatsisunut aningaasaliissutaannik, pisariaqarpoq tamatumunnga tunngasumik immikkut inatsisiliornissaq imaluunniit Inatsisartut inatsisaanni

pioreersuni eqqumiitsuliornermik ingerlatsisunut tunngasumik erseqqissumik pisinnaatitsissummik pilersitsisoqartariaqassaaq.”

Taamaammat siuliani taaneqartut toqqammavigalugit Naalakkersuisut inatsisissatut siunnersuummik Inatsisartut suliaasaannik saqqummiussinissaat pillugu siunnersuut saqqummiukkumavara. Taamaaliornikkut Naalakkersuisut eqqumiitsuliornermut aningaasaateqarfimmik pilersitsinissamut piginnaatinneqassapput.

Nassuiaataasup eqikkarnerani ilaatigut ima oqaasertaliisoqarpoq:

“Kisianni ataaseq tamarmik isumaqatigiissutigaa: Naalakkersuisut eqqumiitsuliornermut kultureqarnermullu aningaasaateqarfimmik assigisaannilluunniit aningaasanik tapiissutik eqqumiitsuliornermut kultureqarnermullu tunngasunik agguasinnaasumik pilersitsinissamik kissaat.”

Aningaasaateqarfiup pilersinneqarneranut atatillugu, pitsaannequtaasinnaasut ilagisinnaasaattut eqqaaneqarpoq, aningaasaateqarfimmut ilaasortaasut akornanni sullitarsianut qanippallaarsinnaanermut, attuumassuteqarpallarsinnaanermut tunngasoq. Assersuutigalugu imaassinnaasoq qinnuteqartoq ilaasortat ilaanniit ilaqutarineqartoq, ikinngutigineqartoq, suleqatigineqartorluunniit, taamaalilluni attuumassuteqarpallaarneq aalajangiiniarnermut sunnuteqassanasoralugu ernumassutigineqarsinnaalluni.

Attuumassuteqannginnissamik tunngatillugu aaqqiissutissat ilagisinnaavaat aningaasaateqarfiup siulersuisunut ilaasortaasut sinniisussaannik toqqaasoqarsinnaanera, taamaalilluni ilaasortaasoq qinnuteqartumut qanippallaartoq aalajangiinermut peqataatinneqarani, sinniisussarli peqataatinneqarsinnaalluni.

Naapertuilluarnerpaamik siulersuisut qanoq katiterneqarsinnaanernut tunngatillugu innersuussutiginnassavara Naalakkersuisut tamanna nammineq pingaartillugu Kattuffiit attuumassuteqartullu peqatigilluinnarlugit inatsisissatut siunnersuummik atorluarsinnaasumik suliaqassasut.

Nassuiaammissaaq allaffissornikkut aningaasartuutit annertusisinnaanernik isumakuluuteqarneq ilanngullugu oqaatigineqarpoq. Taamaattoqassappat aningaasat nunatta karsiani nassaarineqarnissaat naapertuunnerutippara. Eqqumiitsuliornermullu aningaasaateqarfimmik pilersitsineq arlalinnik pitsaaquteqarpoq, soorlu makkuninnga:

- politikikkut attuumassuteqannginneq,
- ukiumi aalajangersimasumi aningaasanik atunngitsuugaqartoqarsimatillugu taakku Nunatta Karsianut utertittariaqarnagit akerlianik katersorsinnaaneri,
- ilisimasalik eqiterisoqassasoq il.il.

Eqqumiitsuliornermut aningaasaateqarfimmik pilersitsinitsigut nutaamik eqqarsarnissamut kiisalu aningaasanik tapiissutinik suliaqarnerup pitsaanerlulerlunilu eqaannerusumik pisinnaanernut periarfissaqalissaaq. Taamaalillutalu aamma eqqumiitsuliornermut kissaataat naammassisinnaalerlugillu piviusunngortissinnaalissavavut.

Qujanaq, neriuppunga siunnersuutiga ilassilluarneqarumaarteq.

Peter Olsen
Inuit Ataqatigiit

Linkit tulliuttut isumassarsiorfigineqarsinnaapput:

<https://www.kunst.dk/>

<http://www.bkf.dk/faeroerne-indfoerer-kunstnerloen/>

Pisortanut aningaasatigut allaffissornikkullu kingunerisassai:

Nassuiaammi taaneqareersutut Namminersorlutik Oqartussat konto pingaarneq 40.95.01 aqutugalugu kulturikkut aningaasaliissutinik agguassisarnerat aningaasaateqarfimmut isumagisassanngortinneqarsinnaavoq. Ukiumi aningaasaliiffiusumi 2017-imi aningaasat taakku 9,7 mio. kr-inik annertussuseqarput.

Aqutsinermi assersuutugalugu Nunafonden aqutsisoqarlunilu siulersuisoqartoq isumassarsiorfigineqarsinnaavoq. Nunafondip aqunneqarnera ukiumut 1.124.000 kr-inik akeqartoq ilisimatitsissutigineqassaaq.

Konto pingaarnerup 40.95.01-p allaffissornikkut aningaasartuutunut matussutissiivittut atorineqannginnissaa inassutigissavara. Taamaammallu Eqqumiitsuliornermut aningaasaateqarfiup pilersinneqarneranut atatillugu sillimmartaarutitut aningaasaateqarfiup aqunneqarneranut immikkut 1 mio. kr-inik missingersuusiortoqassasoq inassutigissavara.

Inatsisissatut siunnersuummik, tusarniaanernik il.il. kiisalu inatsisinut attuumasunik nalinginnaasumik sulinermi A/C-fuldmægtigip ukioq kaajallallugu sulineratut annertutigisumik, tassa 500.000 kr-inik aningaasartuuteqartoqassasoq missingiunneqarpoq.

Namminersortunut aningaasaatigut allaffissornikkullu kingunerisassai:

Nipilersortartunut, atuakkiortunut, filmiortunut isiginnaartitsinermillu ingerlatsisunut kiisalu eqqumiitsuliortunut attuumassuteqartunut allanut aningaasatigut iluaqutissaqassaaq.

Allaffissornikkut aningaasaqarnikkullu pitsaanngequteqassagunaangilaq. Akerlianik oqinnerusumik, sukkanerusumik eqaannerusumillu suliat isumagineqarsinnaalernissaannut periarfissaqassaaq.

Innuttaasunut aningaasatigut allaffissornikkullu kingunerisassai:

Soqanngilaq

Ilanngussaq

Tabel 1 ”Eqqumiitsuliornermut aningaasaateqarfiup ajoqutai pitsaaqutaalu”

Pitsaaqutit	Ajoqutit
<ul style="list-style-type: none"> • Eqqumiitsuliornermut-kultureqarnermullu suleqatigiiffinnik ilanngutsitsineq • Sulianut ilisimasaqarluartunik ataatsimiititaliat • Naalakkersuisunut attuumassuteqannginneq • Ukiumi aningaassaliissutinik atuikinaarineq, Nunatta Karsianut nakkartinneqassangilaq • Sullissisut naliliisarneriinnarnik suliallit • Sulianik ilisimaarinninnerit • Ukiumut qinnuteqarsinnaanerit arlallit • Aningaasanik tapersersortinit tunineqarsinnaaneq il.il. 	<ul style="list-style-type: none"> • Sulianut attuummassuteqarpallaarneq pissutigalugu tutsuiginanngisuseq • Aningaasalersornera • Siulersuisunut aningaasartuutit • Sulisunut aningaasartuutit • Ininut aningaasartuutit • Allaffissornikkut aningaasartuutit

Issuaaffik: Naalakkersuisut (2017) ”*Namminersorlutik Oqartussat kulturikkut aningaasaliissutaat pillugit allaffissornikkut aaqqiissutaasinnaasut pillugit nassuiaat*”